

आकाशवाणी

खास-खास खबरां

1. प्रधानमंत्री नरेन्द्र मोदी होरें आखेआ ऐ जे सबका साथ सबका विकास दी भावना अज्ज दी सरकार दी नीति ते भक्ति ऐ।
2. श्राष्ट्रपति द्रौपदी मुर्मू स्लोवाकिया दी अपनी सफल ते एतिहासक राजकीय यात्रा मगरा भारत आस्तै रवाना होई गेइयां न।
3. केन्द्रीय मंत्री पीयूष गोयल होरें आखेआ जे सरकार भारत-यूरोपीय संघ मुक्त बपार समझौते गी तेजी कन्नै लागू करने आस्तै कम्म करा;रदी ऐ।
4. वरिष्ठ बीजेपी लीडर ते केन्द्रीय गृहमंत्री अमित शाह होरें आखेआ जे बीजेपी 2026 च होने आले तमिलनाडू विधानसभा दा चुनां एआईडीएमके दे नेतृत्व आले गठबंधन कन्नै मिलियै लड़ोग।
5. इक होर अलगाववादी संगठन नै हरियत कांफ्रेंस कन्नै सरबंध त्रोड़े, एनेह संगठनें दी गिनतरी 12 होई गेई ऐ।
6. केन्द्रीय सूचना ते प्रसारण मंत्री अश्विनी वैष्णव होरें आखेआ जे रचनात्मक क्षेत्र च उभरदी अर्थबवस्था च महाराष्ट्र ते मुंबई दा महत्वपूर्ण थाहर ऐ।

<><><><><><><><>

Italy

बपार ते उद्योग मंत्री पीयूष गोयल होरें अज्ज आखेआ जे सरकार यूरोपीय संघ कन्नै मुक्त बपार समझौते गी तौले पूरा करने आस्तै कम्म करा;रदी ऐ। इटली भारत बपार, साईंस ते तकनीक फोरम च बोलदे होई उनें आखेआ जे भारत यूरोपीयन यूनियन दे मिंबरें आस्तै इक प्रमुख बजार दे रूपै च उभरेआ ऐ। उनें आखेआ जे भारत वैश्विक बजार आस्तै बड़्डे पैमाने पर निर्माण कम्में दा विस्तार करने दा मौका दिंदा ऐ। उनें आखेआ जे भारत इटली सांझी रणनीतिक कार्य योजना 2025 थमां 2029 दौनें देशें आस्तै सांझी तरक्की दा रस्ता ऐ। इटली भारत बपार, साईंस ते तकनीक फोरम दा मकसद भारतीय इतावली बपारिएं बशकार सैह्योग गी बढ़ावा देना ऐ।

<><><><><><><><>

Padma Awards

2026 च गणतंत्र दिवस दे मौके पर घोषित कीते जाने आले पद्म पुरस्कार 2026 आस्तै नामांकन इस बरें 31 जुलाई तगर खुल्ले दे न। नामांकन दी प्रक्रिया 15 मार्च गी शुरू होई ही। केन्द्रीय गृह मंत्रालय दा आखना ऐ जे पद्म पुरस्कारें आस्तै नामांकन ते सिफारशां छड़ियां राष्ट्रीय पुरस्कार पोर्टल पर ऑनलाइन स्वीकार कीतियां जांगन। पद्म पुरस्कार च पद्म विभूषण, पद्म भूषण ते पद्मश्री दे सर्वोच्च नागरिक पुरस्कारें चा न। एह पुरस्कार कला, साहित्य ते शिक्षा, खेड्ड, स्वास्थ्य, समाजिक कर्म्म, साईंस ते इंजीनियरिंग, सार्वजनिक मामलें, सिविल सेवा ते बपार ते उद्योग जनें क्षेत्रें च टकोहदी उपलब्धिएं गी मान्यता देने आस्तै दित्ते जंदे न। जाति, व्यवसाय, पद जां लिंग दे भेदभाव बिजन सब्बै व्यक्ति पुरस्कार आस्तै योग्य न।

<><><><><><>

US-Policy

विदेश मंत्री डॉ. एस.जयशंकर होरें आखेआ ऐ जे अमरीका नै दुनिया कन्नै जुड़ने दे अपने नजरियै च बुनियादी बदलाव कीता ते एहदे नतीजे दा इक क्षेत्र च मसूस कीते जा करदे न। नमीं दिल्ली च ग्लोबल टैक सुमिट च बोलदे होई उनें आखेआ जे एहदी तकनीकी परिणाम बड़े डूहंगे होंगन। की जे अमरीका सब्बने थमां बड्डी अर्थबवस्था ऐ ते अमरीका गी फही महान बनाने च तकनीक दी बड़ी भूमका ऐ। उनें आखेआ जे तकनीक नै बपार गी राष्ट्रीय सुरक्षा दे प्रति मता संवेदनशील बनाई दित्ता ऐ।

<><><><><><>

Healthcare

केन्द्रीय श्रम ते रोजगार मंत्री डॉ. मनसुख मांडविया होरें आखेआ ऐ जे सरकार नै देश दे लोकें आस्तै स्वास्थ्य सेवाएं गी मता सौख्खा ते सखल्ला बनाया ऐ। फरीदाबाद च ईएसआईसी मैडिकल कालेज ते अस्पताल दे दुए स्नातक समारोह गी संबोधित करदे होई डॉ. मांडविया होरें आखेआ जे सब्बने डाक्टरें गी राष्ट्र पैहले दी भावना कन्नै कम्म करना चाहिदा। उनें आखेआ जे जेकर देश गी विकसित राष्ट्र बनाना ऐ तां देश दे सब्बने नागरिकें गी सेहतमंद होना चाहिदा। उनें आखेआ जे डाक्टरें दा बरताह मनुखता कन्नै भरोचे दा होना चाहिदा।

<><><><><><>

Amit Shah

बीजेपी दे वरिष्ठ लीडर ते केन्द्रीय गृहमंत्री अमित शाह होरें आखेआ जे बीजेपी 2026 च होने आले तमिलनाडू विधानसभा दे चुनाएं एआईएडीएमके दी अगुवाई आले गठबंधन कन्नै मिलियै लड़ोग। अज्ज चेन्नेई च मीडिया कन्नै गल्लबात करदे होई उनें आखेआ जे एह नरेन्द्र मोदी हुंदी सरकार गै ही जिने तमिल नोजवानें गी यूपीएससी दा मतेयान तमिल च लिखने दी अनुमती दित्ती ही। उनें डीएमके सरकार पर छात्रें गी तमिल भाषा च डाक्टरी ते इंजीनियरिंग दी पढ़ाई नेई करन देने ते त्रै भाषी शिक्षा च दोहरे मापदंड अपनाने दा आरोप लाया। उनें डीएमके ते कांग्रेस दी आलोचना करदे होई आखेआ जे एह पार्टियां लोकें दी जरूरतें गी नेई समणदियां ते अपना अजेंडा चलांदियां न। उनें एह बी आखेआ जे मुख्यमंत्री एम.के.स्टालिन अपनी सरकार दे 39 ज्हार 665 करोड़ रपे दे शराब घोटाले आस्तै जवाबदेह न।

<><><><><><>

PM-MP Visit

प्रधानमंत्री नरेन्द्र मोदी होरें आखेआ ऐ जे गरीबें ते वंचितें गी उबड़ा चुक्कने दा संकल्प सबका साथ सबका विकास ते सेवा दी भावना अज्ज सरकार दी नीति ते भक्ति ऐ। श्री मोदी मध्यप्रदेश दी अशोकनगर दे ईशगढ़ च श्री आनंदपुर धाम च श्रद्धालुएं गी संबोधत करा करदे हे। श्री मोदी होरें आखेआ सेवा दी भावना सरकार दे केन्द्र च ऐ। सरकार सब्बने धड़ें आस्तै कम्म करा'रदी ऐ। पर्यावरण दी राक्खी आस्तै इक पेड़ मां के नाम अभियान गी बी शुरू कीता गेआ।

<><><><><><>

IMD

भारतीय मौसम विभाग नै जम्मू कश्मीर, हिमाचल प्रदेश, उत्तराखंड, हरियाणा, पंजाब ते राजस्थान च बड़ी मती बरखा गी दिक्खदे होई ओरेंज अलर्ट जारी कीता ऐ। मैहकमे दा आखना ऐ जे राजधानी दिल्ली च बी रुकी रुकियै बरखा बरी सकदी ऐ। आकाशवाणी समाचार कन्ने गल्ल करदे होई वरिष्ठ सांईसदान आर.के.जेनामनी होरें आखेआ जे 14 अप्रैल तगर मुल्खे च लूह चलने दे कोई बी असार नेई ऐन।

<><><><><><>